

**Usorac najavljuje osnivanje poljoprivredne komore BiH**

# NEĆEMO SUDBINU MLJEKARA U HRVATSKOJ

**U prvih devet ovogodišnjih mjeseci u Hrvatskoj je proizvodnja mlijeka manja za 110 miliona litara, to je kao godišnja proizvodnja u RS-u**

Predsjednik Udruženja poljoprivrednih proizvođača mljekara Republike Srpske Vladimir Usorac gotovo da se nasmijao kada smo ga upitali da li je juče bilo ikakvih reakcija zvaničnika na nastavak blokade carinskih terminala koju su mljekari započeli protekle srijede.

“Oni ne rade ni radnim danima, kamoli nedjeljom! U utorak je sjednica ministarskog vijeća, pa ćemo nakon nje znati koliko su nas ozbiljno shvatili”, kaže Usorac.

Mljekari su blokirali terminale u Bijači, Gradiški, Izačiću, Orašju i Gorici, smatrajući neloogičnim da mlijeko koje se uvozi i podliježe carinama bude jeftinije od domaćeg. Inače, prema Usorcu, u BiH se 20.000 seoskih domaćinstava bave proizvodnjom mliječnih proizvoda: od toga je 13.000 onih koji mlijeko direktno isporučuju mljekarima, a sedam hiljada ga isporučuju individualno.

## Na traktorima u Sarajevu

“Sada je sjetva jesenjih kultura, pa se mi svi i time bavimo, a krave stalno moraš hraniti, musti ih. Stoga smo napravili raspored. Po dva člana UO su na svakom terminalu zajedno sa po desetak mljekara i mijenjamo se. Neki novinari kažu, jeste li se to povukli. Ma, kakvi, ali kada smo, vojničkim jezikom kazano, zauzimali terminale, onda nas je bilo više, i s traktorima smo došli, a sada nas je naravno manje”, ističe Usorac ponavljajući glavne zahtjeve mljekara upućene Vijeću ministara BiH.

“Nećemo odustati, pa i po cijenu da sa traktorima dođemo u Sarajevu, od uvođenja prelevmana na uvoz mlijeka u iznosu od 0,72 KM i obezbjeđivanja plavog dizela”, ističe Usorac, od kojeg saznajemo da na graničnim prelazima mljekari zapravo i nemaju koga blokirati.

“Svi koji su namjeravali dolaziti u BiH, znajući šta ih čeka, odustali su. Mi smo, ovdje, u



Jedino su Česi opstali zato što je to interes Njemačke koja od njih uzima mlijeko

**UTORAK DAN D**  
**Oni ne rade ni radnim danima, kamoli nedjeljom! U utorak je sjednica ministarskog vijeća, pa ćemo nakon nje znati koliko su nas ozbiljno shvatili, kaže Usorac**



Gradiški, 48 sati držali jedan šleper surutke u prahu iz Holandije i na kraju smo ga pustili za Sarajevo. Procijenili smo, nije naša konkurencija. Surutka služi sa proizvodnju eurokrema, napolitanki. Čovjeka koji je vozio šleper izveli smo na večeru, lijepo smo se družili. Nije on kriv, radi svoj posao, ali nismo ni mi krivi”, govori Usorac, dodajući da su pustili i šleper s biljnim maslacem, koji takođe nije konkurencija domaćim proizvođačima. Kaže da su policajci i carinici izuzetno korektni prema mljekarima koji vrše blokadu.

“Znaju da smo u pravu, ali naš problem i jeste u tome što nas svi podržavaju. A mi hoćemo zakonske propise zahvaljujući kojima ćemo moći opstati. Ne da doživimo sudbinu mljekara u regiji i u tome smo svi mi mljekari u BiH jednoglasni”, jasan je Usorac, od kojeg saznajemo da je u prvih devet ovogodišnjih mjeseci u Hrvatskoj proizvodnja mlijeka manja za 110 miliona litara.

## E, Titina vremena

“Da biste shvatili koliko je to, evo, toliku količinu mljekari u

Republici Srpskoj proizvedu za godinu”, ističe Vladimir Usorac, dodajući da su se, ulaskom u EU, isto kao i mljekari u Hrvatskoj “proveli” i mljekari u Bugarskoj, Mađarskoj, Rumuniji.

“Jedino su Česi opstali zato što je to interes Njemačke koja od njih uzima mlijeko. Mi nećemo da budemo ničija marioneta, hoćemo da uzmemo, kako se to za Titina doba govorilo, sudbinu u ruke. Zato ćemo i osnovati poljoprivrednu komoru. Vlast ne želi partnera, ali će ga dobiti”, tvrdi Usorac.

Opet, ministar vanjske trgovine i ekonomskih odnosa BiH Boris Tučić kazao je da uvoz mlijeka u BiH nije povećan u odnosu na prošlu godinu nego da je ostao isti i u vrijednosti je do deset miliona KM mjesečno. Osvrćući se na zahtjeve za uvođenje akciza za mlijeko, naglasio je da mlijeko i mliječni proizvodi ne podliježu ovakvoj vrsti poreza, a, ukoliko bi akcize bile uvedene, onda bi se odnosile i na strane i na domaće proizvođače.

E. KAMENICA

## VIJESTI



## Audio-materijal je montiran

Predsjednik Vlade RS-a Željka Cvijanović izjavila je juče da je audio-materijal na kojem navodno govori o kupovini poslanika montiran i da predstavlja najobičniju spekulaciju sa jasnim političkim ciljem. “Nema potrebe da to posebno komentarišem, jer nadležne službe već djeluju po službenoj dužnosti i rade na utvrđivanju odgovornosti”, rekla je Cvijanović za Smu.

Cvijanovićeva je dodala da je protiv nje kao građanina, ali i kao predsjednika Vlade RS-a, učinjeno ozbiljno krivično djelo, pa i odgovor nadležnih organa mora biti ozbiljan. Poručila je da su oni koji su taj materijal napravili, montirali i emitovali zašli u kašnivu sferu, te da im neće pomoći to što unaprijed traže alibi objašnjavajući da se ne može potvrditi njegova autentičnost.

## Radikali RS-a traže istragu

Srpska radikalna stranka Republike Srpske pozvala je Specijalno tužilaštvo Srpske i Tužilaštvo BiH da pokrenu istragu povodom audio-materijala na kome navodno međunarodni sekretar SNSD-a Željka Cvijanović govori o “kupovini” poslanika. Radikali poručuju da nadležni organi moraju istražiti da li je i kojim poslanicima nuden novac, te ističu da je riječ o teškom krivičnom djelu ukoliko je audiomaterijal autentičan, javlja Srna.

“Ukoliko nadležni organi ne bi stali ukraj ovakvim kriminalnim namjerama, pojavila bi se mogućnost da skupštinsku većinu formiraju kupljeni poslanici”, upozoravaju iz SRS-a RS-a.

Radikali u saopštenju ističu da je vrijeđanje poslanika, i odnos prema njima kao prema robi koja ima cijenu, do sada u javnosti najveća uvreda i poniženje institucijama RS-a.



## Audio-materijal je autentičan

Poslanica SDS-a u Predstavničkom domu Parlamenta BiH Aleksandra Pandurević vjeruje u autentičnost audio-materijala koji je prekučer objavio portal Klix.ba, a na kojem premijerka Republike Srpske Željka Cvijanović govori o “kupovini poslanika”, a koji, kako je navela, pokazuje da i u SNSD-u postoje časnici političari koji su ogorčeni korupcijom. Na jučerašnjoj konferenciji za novinare u Istočnom Sarajevu Pandurevićeva je navela da se ovim slučajem testira spremnost istražnih institucija za borbu protiv korupcije. Ona je istakla da SDS od policije i tužilaštva očekuje hitnu istragu, te da utvrde činjenice, podignu optužnice i uhapsu aktere ovog slučaja, kako bi prije formiranja vlasti spriječili da korumpirani političari dođu na vlast.

## TAKOREĆI... RASPIRIVANJE

Dopredsjednik Stranke za BiH Gradimir Gojer oglasio se juče saopćenjem za javnost u povodu “nezabilježene drskosti koju je ispoljila Srpska radikalna stranka dr. Vojslav Šešelj organizirajući 15. novembra javni skup u Beogradu, na kojem su ponovljene neke od najcrnijih fašističkih misli o prekomponiranju teritorija ex-Jugoslavije”.

– Prosto je neshvatljivo da demokratska javnost u BiH sve ovo prati mirnom šutnjom, ističe Gojer, napominjući da retrogradnost pojave Šešelja u javnom životu Srbije i njegove neskrivene velikosrpske ambicije, ponovljene na mitingu u Beogradu, pokazuju kako je današnja vlast u Srbiji i dalje potpuno nedistancirana od onoga što je fašističko zlo koje je na naše prostore emanirao četnički pokret, kaže Gojer.

